



## Protocol

dalla seduta dil cussegl da vischnaunca,  
venderdis, ils 22 da fevrer 2019: allas 20<sup>15</sup> – 21<sup>25</sup>  
Liug: Casa communal

---

**Presidi:** Armin Berther

**Actuar:** Paul Duff

**Presents:**

- |                                                                                       |                                                                                                              |                                                                                                                  |
|---------------------------------------------------------------------------------------|--------------------------------------------------------------------------------------------------------------|------------------------------------------------------------------------------------------------------------------|
| a) Cussegl                                                                            | Christoph Berger<br>Adrian Deflorin<br>Mario Flepp<br>Rita Huonder-Tenner<br>Armin Manetsch<br>Livio Zanetti | Stefan Columberg<br>Edgar Durschei<br>Anna Maria Genelin<br>Admir Jasarevic<br>Giusep Lozza<br>Martino Sabbadini |
| b) Suprastonza                                                                        | Robert Cajacob<br>Victor Flepp<br>Jris Lombris                                                               | Clemens Berther<br>Wendelin Jacomet                                                                              |
| c) Perstgisas<br>cussegl                                                              | Christian Loretz                                                                                             | Helga Probst-Linder                                                                                              |
| d) Cumissiun preparatoria per la lescha d'encurir cristallas e mineralias e lavar aur |                                                                                                              |                                                                                                                  |
| e) Hosps                                                                              | 4                                                                                                            |                                                                                                                  |

## Plaid d'avertura entras il president

La gronda neiv dil schaner ha uss tuttina schau anavos fastitgs. La tegia dall'Alp Lumpegna ed in clavau ein vegni unfrenda dad ina lavina freida ils 13 da schaner 2019. Igl ei beinpusseivel che quella lavina ei culpeivla ch'il signal d'alarm dalla Val Stalusa ha tschentau sin tgietschen.

Deputau e genau Clemens Berther ha en quei connex gest priu la caschun e tschentau alla regenza la damonda da segirar pil futur la via denter Sumvitg e Mustér. Quei cun in indrez d'alarm supplementar per la Val sogn Placi e quei tenor il medem sistem sco tal ella Val Lumpegna. Medemamein ha el tschentau la damonda per in indrez da sittar lavinas en la Val Lumpegna. Plinavon ei la tematica en connex cun in sviament dil vitg da Mustér puspei vegnida lantschada e tematisada. Per reussir in tal project drovan ins denton entgins onns sche buc decennis. Denton enzacu ston ins far igl emprem pass. Cordial engraziament per igl engaschi en favur dalla Sursassiala. Uss vala ei dad esser perseveronts e da star vid la balla.

Suenter l'iniziativa per la lescha da habitaziuns secundaras, ch'il pievel ha acceptau ils 11 da mars 2012, ha ils 10 da fevrer 2019 in'ulteriura iniziativa aunc pli rigurusa fatschentau la Svizra. L'iniziativa encunter la construcziun disordinada ei legrevlamein buca vegnida acceptada, el Grischun cun dapli che 70% dallas vuschs valeivlas. Tonaton ha la periferia e buc il davos ils responsabels politichers da sbatter en tgei fuorma e co la planisaziun dil territori sespleiga per ina decisiun ch'ei lantschada dalla confederaziun e dil cantun. Cheu vegnin nus ad udir dabia il proxim temps e segirafranc porta quella tematica a nus entginas surpresas. La periferia, cunzun en las valladas, sto sbatter cun peis e mauns per mintga metter quadrat zona da baghegiar che svanescha dalla val giu.

Uss denton avunda dil vargau. Jeu selubeschel da mirar el futur e da piarder enzacons plaids davart il tscheiver. Quel stat avon porta ed jeu engraziel gia oz ad in e scadin che s'engascha ed ei promts da far ord quei temps in temps hilaric, in temps semplamein in tec auters. Seigi quei cun decorar fatschentas, ustrias e buc il davos nies bi vitg. Buc d'emblidar il til da tscheiver, las musicas da tscheiver, la Dertgira nauscha e la Sibla che s'audan definitivamein tier nossa cultura tscheivvila e che drovan dabia engaschi da pliras personas passionadas. Jeu denton sun buc quel dil tscheiver perquei plaidel uss pli bugen dil sport.

Naven dils 21 entochen ils 24 da mars 2019 savein nus beneventar atletas ed atlets dalla cuppa mundiala digl ISMF (federaziun internaziunala per skis da muntogna). L'uniun Trofea Péz Ault organischa per la 10avla gada ina cuorsa da skis cun skis da turas. Jeu mez sun el comite d'organisaziun e responsabels per l'inscripziun, la logistica ed il star surnotg dallas equipas. Nus savein beneventar buca meins che 200 personas internaziunalas cheu tier nus a Mustér. Tier quellas saudan ils atlets, ils trenaders e fisioterapeuts denton era personas ufficalas dalla ISMF e digl CAS (Club Alpin Svizzer). Pia personas che tuornan suenter l'occorrenza a casa e che raquentan con bi e tgei stupenta infrastruttura che nus havein cheu a Mustér. Las grondas equipas vegnan ad esser ils Svizzers ed ils Talians cun mintgamai 24 atlets ed ils Franzos cun 20 atlets. La sonda ha liug la cuorsa individuala. La partenza ha liug els mises da Caischavedra. La ruta va parallel dallas sutgeras siadora cun ina viseta sin la Muota silsuenter vinavon a Lai Alv entochen prest sut il Péz Ault. Leu dat ei in punct da scumiada ed ils skiunz da turas descendan silsuenter entochen tier l'ustria da Lai Alv. Lu ha ei puspei num da trer si las pials ina davosa gada per surmuntar il culoir grond dil Péz Gendusas per midar vi en la Val da Gendusas Dadens. Arrivai sisum il culoir eis ei da sepinar per la descensiun sur Gendusas entochen puspei anavos all'arrivada els mises da Caischavedra.

Tut en tut ei quei ina differenza d'altezia da 1'640 meters cun ina distanza da 14.3 km. Il pli spert currider vegn ad haver per quei percuors meins che duas uras. Sper la cuorsa dalla cuppa mundiala ha liug sin il medem trassé la cuorsa populara ch'ei segirafranc enconuschenta tier ils biars da vus. Tier la cuorsa populara va ei en emprema lingia per guder igl ambient e la biala cuntrada.

La dumengia suonda lu il "vertical". Quei vul dir d'ascender il pli spert pusseivel naven da Sontga Catrina sin la pista sur Peisel, Plaunca entochen a Caischavedra. Ils sperts vegnan ad haver per quei tschancun circa 20 minutas. Era cheu dat ei ina cuorsa populara ch'ei pli pacifica.

Per las cuorsas havein nus respectiv igl ISMF ina firma "Infront" che ha ils dretgs da filmar e che vegn a producir material da film per la televisiun. Cun quei che la destinaziun Sedrun Mustér ei sponsur local principal vegn quei a dar ina fetg buna reputaziun. Plinavon essan nus

da Mustér ina dallas paucas cuorsas che sespleiga en tiara romontscha e tudestga e che ha la quida da menar atras ina tala occurrenza sin quei nivel.

Per Mustér ei quei in grond pass per vender nies territori muntagnard a persunas internaziunalas che aduran il sport da neiv. Seigi quei igl ir cun skis ni per far turas da skis. Pertgei il territori ei fenomenals e porscha per mintgin il giavischau.

Jeu envidel in e scadin da perseguitar las cuorsas dils 23 e 24 da mars 2019 a Sontga Catrina ni a Caischavedra. Quei dat ina grondiusa caussa cunzun sche l'aura manegia aunc bein cun nus quels dis.

### *Communicaziuns*

#### Mortoris

Elisabeth Huonder-Senn, naschida ils 02-02-1941, morta ils 23-01-2019

Battista Fry-Manetsch, naschius ils 26-04-1922, morts ils 29-01-2019

Julia Maria Schuoler, naschida ils 12-03-1930, morta ils 08-02-2019

#### Naschientschas

Dapi la davosa seduta dil cussegl da vischnaunca ha ei dau neginas naschientschas.



**Cussegl da vischnaunca 2017/2020**

**Protocol nr. 18**

Seduta dils 2 da fevrer 2019

---

**Tractandas:**

1. Protocol 17-2017/2020
2. Saramentaziun dil niev cusseglier da vischnaunca
3. Lescha davart igl encurir cristallas e mineralias ed il lavar aur:  
Revisiun parziala (messadi nr. 28-2017/2020)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér  
Il president: Igl actuar:

Armin Berther

Paul Duff



Cussegl da vischnaunca 2017/2020  
Protocol nr. 18  
Seduta dils 2 da fevrer 2019

---

## 1. Protocol

*Protocol nr. 17-2017/2020*

### **Decisiun:**

*Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.*

*Il protocol vegn **approbaus senza midadas.***

Cussegl da vischnaunca Disentis/Mustér  
Il president: Igl actuar:

Armin Berther

Paul Duff



## **2. Saramentaziun dil niev cusseglier da vischnaunca**

Armin Berther president dil cussegl da vischnaunca:

Il president dil cussegl fa la damonda d'empermischun:

Martino Sabbadini, proponius sco candidat dil vischinadi Vitg ed eligius sco niev commember dil cussegl da vischnaunca en elecziun tgeua entras la suprastanza communal, empermettas Ti d'ademplier tut las obligaziuns da Tiu uffeci tenor meglier saver e puder.

Cusseglier Martino Sabbadini:

"Jeu empermettel!"

Il president dil cussegl da vischnaunca surdat al niev cusseglier ina guva "pin" cun igl uoppen dalla vischnaunca Mustér. Quel duei el purtar sco representant dil cussegl da vischnaunca da Mustér.

Cussegl da vischnaunca Disentis/Mustér  
Il president: Igl actuar:

Armin Berther

Paul Duff



### **3. Lescha davart igl encurir cristallas e mineralias ed il lavar aur Revisiun parziala (messadi nr. 28-2017/2020)**

*Presentaziun:*

Suprastonza:

Gerau Victor Flepp: La lescha actuala datescha digl onn 2000. Las vischnauncas cunfinontas han gia revediu e midau la lescha. Quell'attracziun ei zun dumandada ed ha purtau in bien num a Mustér e promoviu il turissem. Per part ei vegniu surduvrau la situaziun buca reglada, cun quei che la lescha ord igl onn 2000 lubeva da lavar aur sin igl entir intschess dalla vischnaunca Disentis/Mustér. Per buca schar disfar il letg dil flum e per enzonar las activitads ha ei basignau ina lescha era per scaffir la zona ch'ei definida sin la carta geografica. Cun la lescha nova lain nus definir ils loghens lubi per il lavar aur resp. serrar territoris. Quella midada possiblitescha a nus da castigiar las persunas che lavan aur en loghens buc lubi e giavischai. La lescha vegn era transladata per tudestg per dar als turists las determinaziuns legalas.

**Discussiun:**

Cussegl:

Egl art. 4 ei stipulau "La suprastonza sa incassar taxas da singulas persunas". Daco vegn quei buca gest scret "La suprastonza incassescha taxas...?"

Gerau Victor Flepp:

Igl incasso sereferescha sin in auter artechel. Actualmein incassescha la suprastonza communal neginas taxas tier persunas singulas sco turists. Per il diever commercial ein las taxas definidas egl artechel. Cun la stipulaziun "sa incassar" eis ei pusseivel da midar la pratica actuala ed incassar taxas era tier persunas singulas, l'interpretaziun "saver" lai la libertad.

Cussegl:

Cussegliaer Armin Manetsch fa la proposta da midar egl artechel 8 lit.a. la stipulaziun "uuls serrai" en "territori d'uaul". Quel ei lu indicaus sin cartas e pli capeivels d'eruir.

Gerau Victor Flepp:

La stipulaziun "uuls serrai" ei manegiau in uaul cumpact. Suenter l'aua dat ei caglias e plontas singulas ch'ins sa definir sco uaul denton buca sco uaul serrau.

Cussegl:

Las Ruinas nua ch'ei vegn lavau aur ei buc in uaul serrau il liug sesanfla denton en il territori d'uaul e mass entras la midada sut territori scumandau.

Las Ruinas e Cresta Sura sesanflan medemamein en il territori d'uaul. Ei va cheu era per la lubientscha da rimnar cristallas che duess esser pusseivel en tals loghens.

Battesta Tschuor, commember dalla cumissiun preparatoria:

En Las Ruinas creschan plontas e caglias e cheutras sesanfla quei liug buca egl uaul serrau. Ei fuss da deplorar e da disavantatg sche quels loghens ch'ei oz aviarts per lavar aur e rimnar cristallas e mineralias vegnessen entras la midada dil text dalla lescha sut scamond. Tenor la presenta stipulaziun ei quei buc il cass.

Cusseglia Armin Manetsch:

El retila sia proposta en favur dalla proposta dalla cumissiun.

Cussegl:

Egl art. 16 vegnan las taxas regladas. Cheu ei buca clar tgi che venda lubientschas e per tgei prezi. Egl artechel fuss ei d'aventatg da menziunar ils loghens da vendita dallas patentas sco era da visar sin il regulativ da taxas.

Gerai Victor Flepp:

Las taxas ein indicadas e publicadas sco regulativ. Ei dat taxas minimalas e maximalas. En quei senn eis ei clar per la persuna che ha da pagar la taxa.

President communal Robert Cajacob:

La lescha ei applicabla per la suprastanza communal e dat cheutras il maun liber d'exequir il dretg. Ils regulativs ein enconuschents ad in e scadin.

Gerai Victor Flepp:

Egl art. 24 ha l'endretga formulaziun en connex cun evtl. midadas necessarias. La lescha passa retroactivamein en vigur cun ils 01-01-2019.

Cussegl:

Il cussegl havess spitgau ch'ins havess definiu la grondezia e profunditad resp. con lunsch ch'ins astga disfar il vau dil flum. El vargau eis ei vegniu scavau bravamein senza respect.

Ina lescha sto era vegnir controllada ch'ella vegni tenuta en. Tgi fa quella controlla ch'ei vegni buca duvrau palfier e zappun el vau dall'aua?

Gerai Victor Flepp:

Egl art. 13 ein ils utensils lubi nudai. Tier ils existents ein aunc dus vegni vitier. Palfier e zappuns ein buc lubi. Cun tals uaffens san ins era cavar e disfar la riva. Las ruosnas vegnan suenter ina malaura puspei ulivadas cun glera dil flum.

President communal Robert Cajacob:

Las controllas vegnan definidas ella nova lescha da polizia ch'ei en preparaziun. Oz ein ils survegladers da pesca e catscha quels che controlleschan e san punir tals che setegnan buca vid igl uorden. Co ei vegn definiu las controllas egl avegnir vegn perscret ella lescha da polizia ch'ei en elavuraziun. Nus essan era cun la Securitas en contractivas.

### **Decisiun:**

#### **Il cussegl da vischnaunca decida senza cuntervuschs ed abstenziuns da:**

- 1. Approbar la revisiun parziala dalla lescha davart igl encurir cristallas e mineralias ed il lavar aur;**
- 2. Approbar la carta cun la zona lubida da lavar aur;**
- 3. Suttametter quei conclus al referendum facultativ tenor art. 21, lit. b dalla costituziun communal.**

Cussegl da vischnaunca Disentis/Mustér  
Il president: Igl actuar:

Armin Berther

Paul Duff





#### 4. Ura da damondas (conform ad art. 44 dil regulativ da fatschentas)

Cussegl: Damonda alla suprastanza communal

Cussegliaer Christoph Berger:

##### **Risposta a caschun dil cussegl dils 22 da fevrer 2019 entras president communal**

##### **1) Casa Hess**

Dapi in pèr jamnas eis ei bein veseivel che la "casa Hess" ei venala.

La parcella 736 ha gia Guido de Castelberg vuliu cumprar. Dapi bunamein 30 onns emprova la vischnaunca da Mustér da vegnir tier quei sulom. L'idea era da sviluppar e da far pli attractiv quei areal resp. da finalmein crear in coc dil vitg. Quella parcella ei strategicamein il meglier liug ch'ins sa haver. Ella sesanfla directamein sper la staziun amiez Mustér ed ussa savessan ins finalmein cumprar la parcella!

Damonda:

- Tgei ha la suprastanza gia interpretadiu en caussa? Dat ei schon resultats ch'ins sa presentar?

*Che la vischnaunca ei dapi dabia onns interessada vid la parcella "curtin Hess" ei nuot niev. Il president communal ei il mument en contractivas cun il biro ch'ei incaricaus cun la vendita dalla casa e dil curtin Hess. Schebein la vischnaunca fuss habla e prompta da pagar il prezi che vegn pretendius ei in'otra caussa. Cert ei che la vischnaunca savess ord raschuns finanzialas buca cumprar la parcella per agen diever ni per realisar agens projects. Quei fuss plitost caussa d'investurs privats.*

- Tgei prioritad ha in'eventuala investiziun enviers auters projects en vischnaunca?

*Ils projects previ pils proxims onns ein defini ed han prioritad. Da tgeinins ch'ei setracta ei enconuschent al cussegl da vischnaunca. La vischnaunca ha neginas pusseivladads da far investiziuns en quei liug. La suprastanza vesa sulettamein ina cumpra dalla parcella entras la vischnaunca per saver metter quella pli tard a disposiziun ad investurs cugl intent d'in bien project amiez il vitg. Denton stuess il prezi star en ina rama giustificada.*

- L'interpellaziun d'il cussegliaer Armin Berther, actual president d'il cussegl da vischnaunca, demuossa ch'il pli grond problem en vischnaunca ei actualmein il liug ideal per realisar quei?

*La damonda pertuccont il futur dil survetsch medicinal ei vegnida rispundida da geraua Jris Lombris en connex cun l'interpellaziun dil president actual dil cussegl da vischnaunca Armin Berther a caschun dil davos cussegl. Schebein quei fuss il liug ideal stat il mument buca en discussiun. Ils miedis ein sorprendiders privats e libers en lur agir. Quei ei da respectar.*

- La revisiun dalla planisaziun locala ei en lavur. Tgei impurtonza ha quei liug per nies svilup?

*La vischnaunca ha la pusseivladad d'influenzar cun il dretg da planisaziun silmeins empau il futur dil diever dalla parcella. Buca tut stuess forsa vegnir lubiu denton ei sa era buc tut vegnir scumandau. La cumissiun da planisaziun vegn segirafranc a far lur ponderaziuns en caussa. Plinavon ha la suprastanza communal incaricaus la scola aulta per turissem ed economia a Cuera (HTW) da far studis pertuccont il svilup pusseivel ella zona centrala dil vitg e concediu in credit persuerter. Cheu ein cunzun il "curtin Hess" ed il territori dalla staziun cumpri.*

## 2) UniPoLiSi

- Tgei schabegia cun las localitads dalla "UniPoLiSi" a Mustér? Ein quellas localitads amiez il vitg aunc adina bloccadas? Fuss ei pusseivel da sviluppar enzatgei (anteriura stizun ApArt, Postigliun, local dalla banca UBS)?

*Las localitads sesanflan en proprietad privata e buca en proprietad dalla UniPoLiSi. Silmeins pil mument eis ei buca caussa dalla vischnaunca da vegnir activs.*

## 3) Contribuziun pil clima

- Tut ils parcadis cuostan. Sco nus havein realisau han las Pendicularas Mustér quest'unviern "parcadis administrai" (bewirtschaftete Parkplätze). Fuss ei buca gest uss ideal da schar pagar per tut ils parcadis en vischnaunca? (Entradas per infrastruttura, bus local ni promoziun dil diever dils mieds publics tier ils luvrers da vischnaunca).

### **Risposta entras gerau Wendelin Jacomet**

*Nus essan pertscharts dalla situaziun dils parcadis administrai a Sontga Catrina ch'ei pil mument meins giavischai.*

*Il december 2016 ha la suprastonza communal incumbensau la firma Hartmann e Sauter d'elaborar in studi dils parcadis el center dil vitg. Quei ein parcadis a Davos Mustér entochen si Funs. La populaziun parca lur autos sin ils parcadis gratuits dalla vischnaunca ad Acla da Fontauna avon che parcar a Sontga Catrina nua ch'ei vegn quintau per ils parcadis. Oravontut vegn parcau dalla vart dil CSC. Quei fatg sforza nus da prender las mesiras necessarias en caussa.*

*La Lumnezia ha gest mess entuorn il concept e la vischnaunca da Breil ein vidlunder d'elaborar in concept da parcadis. La suprastonza communal ha dau l'incarica al menader digl uffeci da baghegiar, Marco Tomaschett, da sedar giu cun il concept numnau e la situaziun generala da parcar sin intschess communal. Nossa finamira ei da saver metter entuorn quei concept ton pli spert.*

- *Cun uras da parcadis vegnin nus buc a saver crear entradas supplementaras muort ch'ei basegna era las controllas che caschunan cheutras dapli cuosts.*
- *Promover il bus local ni il mied public per ils emploiai da vischnaunca ei in giavisch denton san ins buca pretender ei.*

Cussegl: Damonda alla suprastonza communal

Cusseglia Adrian Deflorin:

El cussegl da vischnaunca dils 15 da november 2018 ein ils presents vegni orientai davart il stan actual dil project Acla da Fontauna. Geru Iso Mazzetta ha informau il cussegl da vischnaunca che las protestas inoltradas vegnien discurrendas el decuors d'entgins dis e che la suprastonza communal spera da saver dar la lubientscha da baghegiar il davos digl onn 2018 ni sin l'entschatta 2019. Entochen il di dad oz ei tenor mia savida la lubientscha da baghegiar buca vegnida concedida. Co vesa il stan actual ora?

### **Risposta entras gerau Wendelin Jacomet**

- *La fatschenta drova dapli temps per sclarir ils detagls dalla vart dils patrums.*
- *Sin giavisch dils patrums da construcziun ei la fatschenta vegnida sistida sin igl avrel 2018.*
- *Igl atun 2018 ei vegniu discussiunau davart la procedura, mo quella ei aunc adina sistida.*
- *Ils patrums han actualmein d'inoltrar lur posiziun per mauns dalla consultaziun cun ils recurrents ed ina completaziun dalla documentaziun da baghegiar.*
- *Il mument eis ei buca pusseivel da comunicar termins exacts.*
- *Davart dalla vischnaunca vegn agiu spertamein.*

*Igl ei necessari da tener il contact cun ils pertuccai e da conceder il temps necessari avon che prender ina decisiun.*

Cussegl: Damonda alla suprastanza communal

Cusseglia Mario Flepp:

**Risposta a caschun dil cussegl dils 22 da fevrer 2019 entras president communal**

Avon varga 2 onns han 5 giuvens iniziants lantschau l'iniziativa da vuler menar contractivas da fusiun en la Cadi. Quei ha dau massa discussiuns, denton era sensibilisau la glied empau sin quella tematica. Sco nus savein tuts ha quell'iniziativa la fin finala e deplorablamein fatg naufragi. Jeu hai gia da sias uras ed ord cumpleina perschasiun susteniu quell'iniziativa.

Uss dus onns pli tard, ils 24 da schaner 2019 han las vischnauncas da Sumvitg e Trun communicau ch'ei vegnan ad elaborar ensemen cun in biro specialisau in project da fusiun. Sco ins ha intervegniu ha la vischnaunca da Breil giu negin interess da secolligiar vid quei project da fusiun. Alla vischnaunca vischinonta da Mustér ei denton mai vegniu fatg ina damonda, schegie ch'ins sa che exact nossa vischnaunca ei da lur temps stada la suletta che ha communicau anoviar ch'ella fuss stada aviarta per contractivas da fusiun ella Cadi. Tenor miu meini ei quei buc stau fetg gentil. Ina cuorta informaziun fuss veramein stada dengrau.

A vesta da quella tematica tschentel bugen alla suprastanza communal las suandontas demondas:

1. Co vesa la suprastanza communal la situaziun actuala pertuccont fusiuns en la Cadi?

*La suprastanza communal da Mustér ha gia avon dus onns sco suletta communicau enviars ils iniziants e las vischnauncas vischinontas la voluntad da menar discuors pertuccont in'eventuala fusiun dallas vischnauncas dalla Cadi. Las ulteriuras vischnauncas (Trun, Sumvitg, Medel e Tujetsch) han claramein communicau ch'ellas seigien buca prontas pil mument ni per discuors ni fusiuns. Breil ha fusiunau dacuort cun Waltensburg/Vuorz ed Andiast e cheutras han els negin interess vid ulteriuras fusiuns. Avon cuort temps ha deputau René Epp danovamein contactau ils presidents comunals cun il giavisch da menar discuors en caussa. Sco sulet haiel jeu, sco president communal da Mustér, communicau ad el la prontadad en caussa. Las ulteriuras vischnauncas han communicau a scret a René Epp, cun copia a mi, ch'els seigien insumma buc prompts da discuorer danovamein davart ina fusiun.*

2. Fuss la suprastanza communal stada aviarta per in project da fusiun comunabel cun las vischnauncas da Trun e Sumvitg, quei sche la damonda fuss vegnida tschentada?

*Sch'il giavisch per in tal project da fusiun numnau fuss vegnius deponius tier la suprastanza communal Mustér, fuss lezza stada pronta ed aviarta per in tal discuors. Denton schebein ina fusiun sulettamein engiuviars fuss prudenta e giavischeivla ei veramein da ponderar bein. Plirs puncts plaiden clar per ina fusiun tier las vischnauncas en la Sursassiala sco. p.ex. turissem, scolas eav.*

3. Co schazegia la suprastanza communal la prontadad en la Sursassiala per in project da fusiun, analog Trun e Sumvitg?

*Pil mument eis ei clar che Tujetsch e Medel han negin interess per in discuors en caussa num dir per instradar in project da fusiun. Per Mustér ei il mument era buc exnum ideals damai che nossa vischnaunca ha il mument enqual project che stuessen vegnir realisai avon (project sanaziun ed engrondaziun dallas purschidas el CSC, Via d'uaul Run, sanaziun serenera, sanaziun casa da scola, planisaziun locala etc.).*

4. Ei la suprastanza communal pronta da far igl emprem pass ed aschia iniziar la damonda allas duas vischnauncas vischinontas Medel e Tujetsch, schebein sclariments en rama d'in project da fusiun fussen giavischadas?

A vesta dallas sfidas futuras (p.ex. scolaesser eav.) e las collaboraziuns intercomunals gia existentas en Surssassiala fuss ei d'engrau dad era far ponderaziuns corrispudentas sisum la Cadi.

*Il vargau ha adina puspei mussau ch'ei fuss falliu sche Mustér fagess igl emprem pass. Gia il gie per menar empremas discussiuns en caussa avon dus onns ha purtau la critica dallas vischnauncas vischinontas che Mustér vegli puspei inagada dapli migliar en tut. Ils davos dus onns ein plirs discuors denter ils collegas presidents comunals davart la tematica fusiun vegni menai.*

*Mintgamai cun il facit: Il mument vegn quei buca en damonda, respectiv la caussa ei aunc buca madira. Promts ein ins plitost per discuors da collaboraziuns. Denton era cheu mo leu nua ch'ei sto ord ina u l'otra raschun bunamein esser. Il mument vesa la suprastonza communal la megliera via dad esser aviarts ed encurir collaboraziuns denter las vischnauncas (p.ex. forestalessers, scolalessers, pumpiers). Vegnin nus aschia tier bunas collaboraziuns sa ina fusiun Sursassiala esser ina opziun el futur.*

*Ussa vuler sfurzar atras enzatgei encunter la clara veglia dallas vischnauncas vischinontas fuss segir cuntraproductiv.*

Cussegl da vischnaunca Disentis/Mustér  
Il president: Igl actuar:

Armin Berther

Paul Duff

### **Informaziuns:**

Suprastonza:

President communal Robert Cajacob:

Da present havein nus cheu a Mustér il survetsch e post d'ambulanza. Schebein quel sa vegnir mantenus egl avegnir ei incert. La Sursassiala ei promta da tener il post vinavon. La nova lescha fa denton grondas pretensiuns al survetsch.

Cussegl da vischnaunca Disentis/Mustér  
Il president: Igl actuar:

Armin Berther

Paul Duff

Disentis/Mustér, ils 25 da fevrer 2019